

## **PETRA JANCA**

Comu l'ancili scavati ne' barcuna re signuri,  
comu a casa re viddani ca nun cuntanu li uri.  
Comu o sali di lu mari ca n'annia li pinzeri,  
comu e mura di campagna ca si vasanu a muntagna.

Comu o mammuru re chiesi troppu chini ri piccati,  
comu o tiatru di li Greci ro distinu cunnannati.  
Comu o latti di la matri troppu aruci pi sti' ucchi,  
comu o pettu di li fimmini i tri misi maritati.

Quannu rintra a lu mulinu lu frumentu nesci finu,  
quannu rintra a li mineri l'acqua arrusica li peri;  
picciriddi senza patri o scuru rattunu cu' l'ugna,  
petra janca ri matina petra janca finu a sira.

Comu a testa di li vecchi sutta l'albiri o paisi,  
comu o lettu di li vergini di lu specchiu cunnannati.  
Comu a scuma di li unni c'arrifriscunu li scogghi,  
comu o fumu di li ligna chi quarianu a nuttata.

Comu chidda ca a Purtedda ni ricorda tanti cosi,  
comu chidda di Capaci fici straggi di 'nnuccenti.  
Comu chidda ca cummogghia la mimoria di la genti,  
comu l'ali re palummi di lu pettu spicicati.

Comu l'ossa di li patri ca na st'isula di ventu,  
alimentanu la terra e lu focu i Mungibeddu;  
e se quannu m'arruspigghiu sempri cca vogghiu turnari,  
supra a quattru petri janchi ca s'abbrazzanu lu mari.

Petra janca, Petra janca, Petra janca, Petra janca.